

Prof. dr. Ejub Džaferović, dekan Mašinskog fakulteta Univerziteta u Sarajevu u povodu dodjele POČASNOG DOKTORATA UNIVERZITETA U SARAJEVU Nj.E. Tun dr. Mahatiru Bin Mohamadu

**VAŠA EKSELENCIJO, TUN DR. MAHATIR BIN MOHAMAD
UVAŽENI GOSTI
DAME I GOSPODO**

Mašinski fakultet Univerziteta u Sarajevu pokrenuo je inicijativu da se Nj. E. gospodinu Tun Mahathiru Bin Mohamadu dodijeli počasni doktorat Univerziteta u Sarajevu.

Nastavno-naučna vijeća Arhitektonskog fakulteta, Građevinskog fakulteta i Elektrotehničkog fakulteta Univerziteta u Sarajevu, podržala su inicijativu Mašinskog fakulteta.

Mahathir Bin Mohamad rođen je u Alor Star, Kedah Malezija 1925. godine. Medicinski fakultet je završio 1953. godine u Singapuru (King Edward VII Medical College, Singapore). Godine 2003. je dobio najveće civilno priznanje u Maleziji titulu **Tun**, koju može nositi najviše trideset pet živih stanovnika Malezije.

Najveći dio svog radnog vijeka dr. Mahathir bin Mohamad bavio se aktivno politikom i bio je premijer Malezije 22 godine. Od ostalih političkih funkcija ističu se: ministar za obrazovanje i ministar za trgovinu i industriju. Dr. Mahathir je bio jedna od najistaknutijih političkih figura Azije i cijelog svijeta, a njegov utjecaj se osjeća i danas. U svom političkom djelovanju je poznat po: iskrenosti, hrabrosti i borbi protiv diskriminacije i dvostrukih mjerila, koja su nažalost česta u savremenoj politici.

Za vrijeme mandata Premijera Malezije, Nj.E. Tun Mahathira Bin Mohamada, njegova domovina je doživjela ekonomsko-industrijski procvat, nestale su etničko-vjerske tenzije, izvršene su ustavne promjene i reforme sistema obrazovanja. U sadašnjem trenutku Malezija, po bruto dohotku po glavi stanovnika, obrazovnoj strukturi, industrijskom razvoju i padu stope smrtnosti novorođenčadi, ne zaostaje za najrazvijenijim zemljama svijeta.

Gospodin Mahathir je u svom međunarodnom djelovanju dokazao prijateljstvo spram Bosne i Hercegovine i njenih naroda, učestvujući aktivno kao „ambasador mira“ u smirivanju ratnih sukoba, a kasnije i u obnovi i razvoju naše zemlje. Svoja pozitivna iskustva da se do dobrih međuetničkih odnosa može doći samo pravednošću, dosljednošću i ekonomskim prosperitetom nastojao je prenijeti i narodima Bosne i Hercegovine. U tom cilju je i vrlo aktivna njegova uloga u

povezivanju privrede i univerziteta dvije države putem međunarodnih projekata. Univerzitet u Sarajevu ima vrlo značajnu saradnju, kako sa univerzitetima u Maleziji, tako i sa privrednim malezijskim kompanijama, a koja se ogleda u realizaciji zajedničkih naučno-istraživačkih projekata.

Dr. Mahathir bin Mohamad je predsjednik GAPID- (Global Alliance for Partnership in International Development), koji je poznat po inicijativama za ulaganje u privredu Bosne i Hercegovine. GAPID će biti jedan od suorganizatora Prve međunarodne investicijske konferencije „Sarajevo Business Forum“, koja se održava ovih dana u Sarajevu, a težište će biti na ulaganja u četiri važne privredne grane: infrastrukturu, poljoprivredu, turizam i energetiku. Dr. Mahathir je u sklopu davanja značaja ovoj Konferenciji, a u saradnji sa Ambasdom Bosne i Hercegovine u Maleziji, održao 17. februara 2010. godine u Kuala Lumpuru poslovnu večeru, na kojoj je prisustvovalo trideset čelnih ljudi velikih malezijskih kompanija, kao i nekoliko velikih biznismena iz Australije, Albanije i Rusije.

Svjesni pozitivne političke i privredne uloge za Bosnu i Hercegovinu i šire, četiri nevladine organizacije, iz reda konstitutivnih naroda BiH, predložile su gospodina Mahathira za Nobelovu nagradu za mir, početkom 2007. godine.

Imajući u vidu izuzetan doprinos dr. Mahathira za političku stabilnost i privredni razvoj naše zemlje, Nastavno-naučno vijeće Mašinskog fakulteta je pokrenulo proceduru dodjele počasnog doktorata Univerziteta u Sarajevu. Na osnovu podrške nastavno-naučnih vijeća Elektrotehničkog, Arhitektonskog i Građevinskog fakulteta u Sarajevu, predložili su Senatu Univerziteta u Sarajevu Tun dr. Mahathira Bin Mohamada, kao kandidata za dodjelu počasnog doktorata Univerziteta u Sarajevu.

U smislu sa naprijed navedenim, Senat Univerziteta u Sarajevu odlučio je jednoglasno da dodjeli počasni doktorat Univerziteta u Sarajevu Nj.E. Tun Mahathiru Bin Mohamadu.

Sarajevo, 07. 04. 2010.godine